

玉函山房目耕帖

雨
留
文
屬

日
耕
山

目耕帖卷一

歷城馬國翰竹吾甫

易一

春秋左傳孔穎達正義引伏羲十言之教曰乾坤震
巽坎離艮兌消息案漢孟喜易專論消息虞翻宗
之此蓋孟虞所述又易緯乾坤鑿度引庖犧氏曰
上山增艮定風剋信立雷作威火水成濟此蓋古
三墳入索中語漢人得而述之梅鶯古易攷原自
序有儒一生問於鶯曰伏羲之作易有畫無文信

乎驚應之曰景差大招曰伏羲駕辯兮王逸注云
駕辯伏羲書名伏羲既有書名駕辯安得謂其無
文哉

連山歸藏書皆不傳朱元昇三易備考說連山云連
山二篇自復至乾爲陽儀自姤至坤爲陰儀其策
萬有一千五百二十又云長分消翕者連山易至
精至變至神之理寓焉乾與坤對乾之長卽坤之
消乾之分卽坤之翕坤之長卽乾之消坤之分卽
乾之翕兌與艮對離與坎對震與巽對餘五十六

卦兩兩相對長分消翕悉準八卦說歸藏云歸藏
易以六甲配六十四卦所藏者五行之氣所用者
五行之家也又云歸藏易首坤尾剝又云歸藏二
篇自甲子至癸巳爲先甲自甲午至癸亥爲後甲
其策萬有八百又云六十四卦藏者十有六用者
四十有八乾爲六十四卦之父坤爲六十四卦之
母坤統藏卦乾統用卦坤乾所以首六十四卦也
有藏斯有用純坤又所以首純乾陸佃云連山始
於艮故曰連山又云連山易長安人家有之其卦

皆縱徐善四易歸藏卦序坤震坎艮兌離巽乾朱
徐之徒蓋及見原書故言之詳明如此今購求不
可得閒嘗就諸書所引各輯爲卷刊之連山遺爻
如姤初六龍化于蛇或潛于窪茲孽之牙中孚初
八一人知女尙可以去歸藏遺爻如瞿有瞿有鰕
宵梁爲酒尊于兩壺兩踰飲之三日然後穌士有
澤我取其魚鼎有黃耳利取鰕鰓有鳧鴛鴦有鴈
鸛鷀君子戒車小人戒徒皆古雅可誦也

朱震漢上易叢說歸藏初經初乾初真初艮初兌初

準初離初釐初巽真坤犖坎釐震也李過西溪易
說艮作狼又載歸藏六十卦名名乾屯蒙訟師比
小毒畜履泰否同人大有狼釐大過頤困井革鼎
旅豐小過林禍觀萃稱僕復母亡大毒畜瞿散家
人節與蹇荔員誠欽恆規夜巽兌離犖兼分歸妹
漸晉明已岑霽未濟遂蜀馬徒西溪以需爲溥小
畜爲小毒畜臨爲林禍大畜爲大毒畜黃宗炎周
易象辭升爲稱剝爲僕无妄爲母亡瞿當屬觀家
人爲散家人渙爲與解爲荔損爲員咸爲誠欽當

屬旅規當屬節夜當屬明夷謙爲兼分當屬睽岑
霽當屬賁遯爲遯蠱爲屬朱氏彝尊經義考瞿在
散家人之前則睽也以損爲員而誠次之則益也
欽在恒之前則咸也古者書契取諸夬於規義近
夜有姤遇取女義疑規當屬夬夜當屬姤也以謙
作兼而分次之則分爲豫也岑霽在未濟之前則
旣濟也以蠱爲蜀而馬徒次之則馬徒爲隨也翰
案歸藏亦六十四卦西溪關其四乾首當有真羅
萃路史注歸藏初經卦皆六位其卦有明夷熒惑

耆老大明之類以夷及熒惑耆老大明四卦補之
恰符六十四卦之數依黃朱二家所釋唯闕噬嗑
賁中孚以義推之熒惑爲噬嗑大明爲賁耆老爲
中孚也

羅苹路史注春秋演孔圖孔子成春秋卜之得陽豫
之卦史記始皇得鎬池君璧言明年祖龍死卜之
得游徙吉陽豫游徙連山卦也

許慎說文解字易蜥易蠃蜒守宮也象形祕書說日
月爲易象陰陽也羅泌路史發揮易者廬蠃之名

守宮是矣身色無恒日十二變是則易者本其變也彖者茅犀之名豨神是矣犀形獨角知幾知祥是則彖者取其幾也象者大荒之獸也人希見生象也按其圖以想其形容名之曰像故其爲字從人於象也此主說文第一義爲說正義引易緯云卦者掛也言懸掛物象以示於人故謂之卦說文爻交也象易六爻頭交也翰案逸周書王會解外臺之四隅張赤帟而諸侯欲息者皆息焉命曰爻闔爻闔卽周禮天官掌舍所設之桎桓鄭康成注

謂行馬其形用兩木相交故稱爻閭易爻取象於此

韓滉澗泉日記引晁子止云易上下篇不言德而言象蓋德不可見而象可驗是以不言乾坤而言天地不言咸恒而言夫婦也上篇始終於天道下篇始終於人事故上篇始於天地終以坎離下篇始於夫婦終於未濟也案此說本之龔原不如張汝明易索以卦之體用言蕭景元易考原以卦之正偏言尤爲精覈張云乾坤坎離曰天行地勢水洊

至明兩作象在上何也四卦者覆而无變體卦也
故其象自體而起用震艮巽兌曰洊雷兼山隨風
麗澤象皆在下何也四卦者覆而相變用卦也故
其象攝用而歸體然則乾坤坎離爲上經之始終
其明體乎震艮巽兌運行乎下經之中其達用乎
蕭云乾坤坎離四正卦也當居上經震巽艮兌四
偏卦也當居下經八卦旣分餘卦以次附焉此兩
經所以分之綱領也每卦各具上下二經每卦之
體各十有六總爲一百二十八體而成六十四卦

皆自八卦本體中分出而生者也坎離之分體在上經爲主在下經爲客震兌之分體在下經爲主在上經爲客

俞汝玉周易集說或疑上經卦三十下經卦三十四多寡不均殊不知卦有對體有覆體何謂覆體屯倒轉爲蒙需倒轉爲訟之類是也何謂對體乾坤坎離頤大過中孚小過相對而不可覆者是也餘皆一卦倒轉爲兩卦故上經卦三十約之則十八下經卦三十四約之亦十八謂之不均可乎卦分

內外二體凡六十四陽六十四陰約爲三十六則
上經純陽卦六純陰卦四下經純陽卦四純陰卦
六陰陽相重上下經皆八不亦均乎上經陽爻八
十六陰爻九十四約爲十八則五十二陽五十六
陰共一百八下經陽爻一百六陰爻九十八約爲
十八則五十六陽五十二陰共一百八其均如此
案此本先天之學而發明卦數得自然之理亦可
取也

漢書藝文志易經十二篇施孟梁邱三家顏師古曰

上下經十翼故十二篇此古初本也自費直以象
象文言雜入卦中鄭元王弼因復更變古經遂紊
宋王洙古本上下經只載爻辭外分卦辭一彖辭
二大象三小象四文言五繫辭上六繫辭下七說
卦八序卦九雜卦十呂大防古經並列卦爻分上
彖下象上象下象繫辭上繫辭下文言說卦序卦
雜卦各爲一篇總十有二篇晁說之古周易卦爻
一彖二象三文言四繫辭五說卦六序卦七雜卦
八吳仁傑古周易上下經後彖傳一象傳二繫辭

上傳三繫辭下傳四文言五說卦上六說卦中七
說卦下八序卦九雜卦十以卦名及初上九六二
用之文歸之繫辭傳以今繫辭上爲說卦上繫辭
下爲說卦中今說卦傳爲說卦下尤多變亂周燔
九江易傳上經乾傳一泰傳二噬嗑傳三下經咸
傳四夬傳五豐傳六繫辭上七繫辭下八自天地
定位以下爲說卦九序卦雜卦不另爲卷故凡九
卷改更次第亦號古易於諸家爲無用呂祖謙因
晁氏本定著十二篇與呂微仲古易合惟十翼並

加傳字朱子本義用其本今本義經文次第與王
弼本同由程子易傳本用王弼董楷作周易傳義
附錄割裂本義以附程傳後遂沿行浸失朱子之
意沈煥有復古易十二篇以東萊訂正古易刊正
今世行本大有功於古學

孔氏正義元亨利貞是乾之四德也子夏易傳元始
也亨通也和也貞正也言乾稟純陽之性故能
首出庶物各得元始開通諧和貞固不失其宜是
以法天而行四德故曰乾元亨利貞矣房審權周